

[Augsburg], 1. Mai 1560

An Johannes Oporinus

UB Basel, Fr. Gr. I 11, fol. 234r.  
Steinmann Nr. 725.

S. P. D. Vtinam quam grato animo libros abs te missos accepi, tam reapse declarare gratum erga te animum, ac potius gratiam referre tibi possem. Sed cum Fortuna vtrique nostrūm nouerca sit: quid agamus? Quanta diligentia causam tuam egerim apud Bomgartnerum, ipse, si vellet, testis esse posset. Sed ancipiti responso elusus, hac ipsa hora iussus sum ad te scribere, vt quoniam ille pro te soluere recusarit, vt tu 100 f. Prechteris Argentinae soluas. Inuitus me hercule, sum μάντις τε καὶ ἄγγελος κακῶν, sed οὐκ ἔστ' ἀπ' ἔργων μὴ καλῶν ἔπη καλὰ. Si eae essent opes meae, vt te istis aerumnis liberare possem: facerem profectò et libenter et citò. sed 30 annorum seruitute id peculij sum assecutus, quo fortassis aduersam valetudinem vnum atque alterum annum, nisi Deo aliter visum sit, sustentare possim. Nam quod ad annuos reditus attinet, Nec deest, nec superest census in tam sumptuosa ciuitate et quotidianis valetudinis offenditionibus, ne quid dicam de pauperum cognatorum sustentatione. Sed ita sunt humana, alijs deest, alijs superest, et fauos absumunt fuci congestos ab apibus. Sed haec hactenus. Epictetum nunc non mitto, quod et grauiorib[us] operibus occupatum te esse arbitror, et valetudine saepius impedior, et hunc vnum partum verè nonum in annum pressum, velim absolui, et vrsino more lupinum catulum lambendo refingi. Demosthenem Morellij non esse editum doleo. Meus Demosthenes abs te remissus eam mihi supsitionem affert (optimam autem in partem accipio, difficultatem tuarum non ignarus) te omnem eius edendi cogitationem abiecisse. Quare et ego omissis inchoatis annotationibus, Quod superest aeui, si quid superesse volunt dij, iucunda potius lectione, quam laboriosa scriptione mihi consumendum esse censeo. et quoniam Index ante annos 8. a me confectus, vsui tibi non erit, eum quoque ad me remitti velim, vt infirmitati memoriae meae sit adiumento. Vale et iniquitati fortunae, ingenij tui atque animi neruos opponito. Cal[endis] Maij 1560.

Hiero[nymus] Wolfius  
Tuus.